

der Beicht, von seiner deudschen Bibel, von seinen streitbüchern wider die Sacramentschwermer vnd Gesetzstürmer ein, wie oben genugsam dargethan. Solches zeigen wir einfeltiger, aufrichtiger, christlicher meinung an, erstlich, das wir Gotte vnserm Herrn solche Bekentnis schuldig vnd die Lere der
5 Bibel vnd D. Luthers helffen wider die verfelscher retten.

[E 4v:] Fürs ander, das die newen Theologen nicht so geschwinde im schreiben fahren vnd, weil sie zu weit aus der bahn gewischt vnd in die Luftsprünge von der hohen zinne des Tempels¹⁵⁰ sich begeben, wider zurückgehen vnd die Jrrthume widerrufen vnd corrigirn, erkleren sich auch deutlich,
10 das sie mit Luthero die Sacramentschwermer verdammen.

Endlich, da sie ja nicht wollen sich zurechte lassen führen vnd alle vnerrichtung vnd warnung hochmütiglich verachten vnd nur mit scheltworten wollen durchbrechen, das vnser Bekentnis bey der Kirchen leuchte vnd etlichen dienen möge zur warnung, zur vorsichtigkeit vnd zum gebet.

15 Jhesus Christus, der da sitzet zur rechten der Maiestet, erbarme sich der betrübten Kirchen, bringe aus vnendlicher gnaden die jrrenden wider zurechte, wehre allen, die fürsetzlich jrrthume ausbreiten, vnd erhalte seine arme Christen in rechtem Glauben, Bekentnis, Gedult vnd bestendigkeit bis ans ende vnd kome ja bald vnd erlöse die seinen aus der betrübten Welt ins
20 ewige Leben, Amen.

D. Johannes Wigandus.

D. Tilemanus Hesshusius.

D. Johan. Fridericus Coelestinus.

D. Timotheus Kirchnerus.

¹⁵⁰ Vgl. Mt 4,5.